



ENTI RREGULLATOR I ENERGJISË  
BORDI

VENDIM

Nr. 129, Datë 10.08.2020

MBI

MIRATIMIN E DISA SHITESAVE DHE NDRYSHIMEVE NË VENDIMIN E BORDIT TE  
ERE NR. 190, DATË 23.11.2017, MBI MIRATIMIN E RREGULLORES PËR  
PËRCAKTIMIN E PAGESAVE TË RREGULLIMIT PËR TË LICENCUARIT

Në mbështetje të nenit 16 pika 5, të Ligjit nr. 43/2015 “Për Sektorin e Energjisë Elektrike”, i ndryshuar, nenit 14, të Ligjit nr. 102/2015 “Për Sektorin e Gazit Natyror” dhe nenit 16 të “Rregullores së Organizimit, Funksionimit dhe Procedurave të ERE-s”, të miratuar me vendimin e bordit të ERE-s, Nr. 96, datë 17.06.2016, bordi i Entit Rregullator të Energjisë (ERE), në mbledhjen e datës 10.08.2020, mbasi shqyrtoi relacionin nr.94/9 prot, date 07.08.2020, përgatitur nga Grupi i Punës, Për miratimin e disa shtesave dhe ndryshimeve në vendimin Nr. 190, datë 23.11.2017, të bordit të ERE,

**Konstatoi se:**

- Me vendimin Nr. 139, datë 24.09.2019, Bordi i ERE-s është shprehur mbi “Fillimin e procedurës për miratimin e disa shtesave dhe ndryshimeve në vendimin Nr. 190, datë 23.11.2017 “Mbi miratimin e rregullores për përcaktimin e pagesave të rregullimit për të licencuarit në sektorin e energjisë elektrike”.
- Neni 17, pika 4 e Ligjit 43/2015, ngarkonte ERE-n me detyrimin për përcaktimin dhe miratimin e pagesave rregullatore që paguhen prej të licencuarve, në përputhje me rregulloren përkatëse në të cilën përcaktohej gjithashtu se “Pagesa duhet të jetë në përpjestim të drejtë me të ardhurat vjetore që vijnë nga veprimtaria e licencuar”.
- ERE me anë të shkreses nr. 631, datë 07.09.2019, njoftoi të gjithë të licencuarit në sektorin e energjisë elektrike dhe gazit natyror mbi këtë vendimmarrje si dhe kërkoi prej tyre dhënien e sugjerimeve dhe opinionëve lidhur me ndryshimet e propozuara brenda 15 ditëve nga dita e marrjes dijeni.
- Në përgjigje të saj shoqëritë u përgjigjën me shkresat si më poshtë vijojnë:
  - Me shkresën nr. 631/2 Prot, datë 22.10.2019, “KASTRATI ENERGY” sh.p.k. shpreh dakordësinë me shtesat dhe ndryshimet në vendimin Nr 190, datë 23.11.2019 "Mbi Miratimin e Rregullores për Përcaktimin e Pagesave të Rregullimit për të Licencuarit në Sektorin e Energjisë Elektrike" të propozuara në vendimin Nr. 139/2019, të bordit të ERE-s.
  - AAES me shkresat nr. 631/3 Prot, datë 28.10.2019, shprehet se e konsideron mjaft pozitive këtë vendimmarrje të Bordit të ERE-s, por e gjykon si të pamjaftueshme, procedurën e iniciuar nga ERE si dhe propozimet e hartuara për të adresuar në menyrë shteruese efektet e

- përlllogaritjes së tarifës pas përfundimit të vitit ushtrimor, duke i hequr mundësinë shoqërive që operojnë në tregun e parregulluar që të përshijnë *ex ante* në metodologjinë e përcaktimit të çmimit/njësi edhe vlerën e tarifës rregullatore.
- Shoqëria OST sh.a. me shkresën nr. 631/4 Prot, datë 25.10.2019, gjithashtu ka përcjellë opinionin e saj lidhur me mënyrën transparente që ERE duhet të bëjë alokimin e kostove për secilin aktivitet (shërbimin) rregullator.
  - Shoqëria Albagaz sh.a. me shkresën nr 631/5 Prot, datë 04.11.2019, shpreh dakortësinë e saj në lidhje me fillimin e procedurave për vendimin e sipërcituar në zbatim të Ligjit nr. 102/2015 "Për Sektorin e Gazit Natyror" si dhe shprehet parimisht dakord për këtë draft dhe përmbajtjen e tij.
  - Ministria e Infrastrukturës dhe Energjisë me shkresën nr. 631/6 Prot, datë 11.11.2019, shprehet parimisht dakord me propozimin e ERE-s.
  - Energji ASHTA sh.p.k. në shkresën nr. 631/7 Prot, datë 06.12.2019, gjithashtu ka shprehur opinionin e saj.
  - Autoriteti i Konkurrencës me shkresën nr. 631/8 Prot, datë 31.12.2019 shprehet dhe vlerëson se "Rregullorja për përcaktimin e pagesave të rregullimit për të licencuarit në sektorin e energjisë elektrike", nuk bie në kundërshtim me ligjin nr. 9121, datë 28.07.2003 "Për mbrojtjen e konkurrencës", i ndryshuar.
- ERE mbasi filloi shqyrtimin e opinionëve sa më sipër në vijim dhe të seancës dëgjimore teknike të datës 04.11.2019 midis Grupit të punës të ngritur për rishikimin e kësaj rregullore dhe palëve të interesit në zbatim të Urdhërit të Kryetarit të ERE, vijoi me analizimin e opinionëve dhe komenteve të palëve të interesit për ndryshime të kësaj rregullore duke vlersuar mundësinë e akomodimit të opinionëve sa më sipër në lidhje me këtë proces mbështetur në legjislationin në fuqi.
  - Kuvendi i Shqipërisë me anë të Ligjit nr. 61/2020 "Për disa ndryshime dhe shtesa në Ligjin nr. 43/2015, "Për sektorin e energjisë elektrike", shfuqizoi fjalinë e dytë të Nenit 17, pika 4, të Ligjit 43/2015, të ndryshuar në të cilën përcaktohej se: "*Pagesa duhet të jetë në përpjesëtim të drejtë me të ardhurat vjetore që vijnë nga veprimtaria e licencuar*".
  - ERE përcakton dhe miraton pagesën rregullatore që paguhet prej të licencuarve, në përputhje me rregulloren përkatëse. Pagesa duhet të jetë në përpjesëtim të drejtë me të ardhurat vjetore që vijnë nga veprimtaria e licencuar.
  - Duke marrë shkas nga opinionin e palëve të interesit sa më sipër si dhe nisur nga vlersimet e grupit të punës, mbi mënyrën më të drejtë dhe transparente për përlllogaritjen e pagesave rregullatore, vlerësojmë se metoda e përlllogaritjes së pagesave të rregullimit e adoptuar nga ERE përpara miratimit të Ligjit 43/2015 "Për Sektorin e Energjisë Elektrike" është një metodë e drejtë dhe transparente e cila përsëri bazohet mbi të ardhurat e gjeneruara nga aktiviteti i licencuar i shoqërive që ushtrojnë aktivitet në sektorin e energjisë.
  - Kjo metodë përlllogaritjeje është adaptuar në një sërë vendimarrjesh të ERE mbi përcaktimin e pagesave rregullatore ndër vite, nuk është kundërshtuar nga asnjë nga palët e interesit gjatë periudhave të mëparshme dhe adreson kërkesën e palëve të interesit për një metodologji të thjeshtë, të kuptueshme dhe transparente.

- Mbështetur në nenin 14 të ligjit nr.102/2015 “Për Sektorin Gazit Natyror”, ERE përcakton dhe miraton pagesat e aplikimit për licencë dhe pagesat rregullatore për të licencuarit në sektorin e gazit natyror, në përputhje me metodologjinë e miratuar prej saj. Kjo rregullore është plotësuar me dispozita mbi përcaktimin e pagesave të Rregullimit subjekteve që operojnë në sektorin e gazit natyror.

Për gjithë sa më sipër cituar, bordi i ERE-s,

### Vendosi:

1. Miratimin e disa shtesave dhe ndryshimeve në “Rregulloren për përcaktimin e pagesave të rregullimit për të licencuarit në sektorin e energjisë elektrike” miratuar me vendimin e bordit të ERE Nr. 190, datë 23.11.2017, si më poshtë:
  - a. **Neni 1 bëhet:** Rregullorja për përcaktimin e pagesave rregullatore për të gjithë të licencuarit e tregut të energjisë elektrike dhe gazit natyror nga Enti Rregullator i Energjisë, është hartuar në përputhje me kërkesat e Ligjit nr. 43/2015 “Për Sektorin e Energjisë Elektrike” I ndryshuar dhe Ligjit Nr. 102/2015 “Për Sektorin e gazit natyror”, i ndryshuar.
  - b. **Neni 3 bëhet :** Objektivi i kësaj rregulloreje të llogaritjes së pagesave rregullatore është, të përcaktojë pagesa rregullatore të veçanta për të gjithë të licencuarit në aktivitetin e prodhimit, transmetimit, shpërndarjes, operimit të sistemeve të mbyllura të shpërndarjes, furnizimit, tregtimit dhe operimit të tregut të energjisë elektrike dhe për të gjithë të licencuarit në aktivitetin e transmetim të gazit natyror, shpërndarjes së gazit natyror, furnizimit të gazit natyror, tregtimit të gazit natyror, operimit në hapësirat e depozitimit të gazit natyror, operim në impiantet e GNL-së; funksionimin e operatorit të tregut të gazit natyror.
  - c. Neni 4.1 ndryshon dhe behet: **Pagesa rregullatore** – pagesa vjetore që të gjitha shoqëritë e licensuara në sektorin e energjisë elektrike dhe gazit natyror paguajnë për llogari të ERE-S për të mbuluar kostot e veprimtarisë rregullatore
  - d. Neni 4.2 ndryshon dhe behet: **Të Licensuar** – Shoqeri të cilat janë licencuar nga ERE për veprimtarite sipas pikes 2 të nenit 37 të Ligjit nr. 43/2015 Për sektorin e energjisë elektrike, I ndryshuar dhe pikes 2 të nenit 22 të Ligjit nr. 102/2015 Për sektorin e gazit natyror, I ndryshuar.
  - e. Shtohet pika 4.4 me përmbajtje: **4.4 Tregu i energjisë** - do të thotë tregut të energjisë elektrike dhe atij të gazit natyror në kuptim të Ligjit nr. 43/2015 Për sektorin e energjisë elektrike, I ndryshuar dhe ligjit nr. 102/2015 Për sektorin e gazit natyror, I ndryshuar.
  - f. **Neni 5, pika 5.1 ndryshon:** Kjo Rregullore është konceptuar konform nenit 17 të Ligjit nr. 43/2015 “Për Sektorin e Energjisë Elektrike”, I ndryshuar dhe nenit 14 të Ligjit nr. 102/2015 “Për Sektorin e Gazit Natyror”, I ndryshuar, ku parashikohet se..
  - g. Neni 5.2 ndryshon dhe behet: Pagesa rregullatore, në zbatim të pikës 52 të nenit 3 të Ligjit 43/2015 “Për Sektorin e Energjisë Elektrike”, I ndryshuar dhe pikes 69 të nenit 4 të Ligjit 102/2015 “Për Sektorin e Gazit Natyror” I ndryshuar, llogaritet dhe mbledhet mbi

- baza vjetore për çdo shoqëri të licencuar, pavarësisht faktit nëse në momentin e llogaritjes së kësaj pagese shoqëria nuk e ka filluar aktivitetin për të cilin është licencuar
- h. Neni 5.5 ndryshon dhe bëhet: Pagesat rregullatore do të miratohen jo më vonë se 60 ditë pas miratimit të buxhetit të ERE të vitit aktual.
- i. Neni 6.1 ndryshon dhe bëhet: Pagesat rregullatore do të llogariten bazuar në peshën specifike që zënë të ardhurat e realizuara nga aktiviteti i çdo të licencuari në vitin paraardhës ndaj totalit të të ardhurave të sektorit të energjisë elektrike, dhe gazit natyror të realizuar për të njëjtën periudhë.
- j. Pas nenit 6.1 shtohet neni 6.1.1 me përmbajtje si me poshte: Të ardhurat për efekt të llogaritjes së pagesave rregullatore do të konsiderohen:
- a. **Për shoqëritë e prodhimit të energjisë elektrike** - të ardhurat e realizuara nga shitja e energjise elektrike të prodhuar.
  - b. Për shoqëritë e transmetimit dhe shpërndarjes së energjisë elektrike/gazit natyror** - të ardhurat e realizuara nga aktiviteti i transmetimit dhe shpërndarjes së energjise / gazit natyror;
  - c. Për shoqëritë e furnizimit dhe të tregëtimit të energjisë elektrike/gazit natyror**- të ardhurat (vlera e shtuar) të realizuara nga shit-blerja e energjisë elektrike/gazit natyror.
- a. Për shoqëritë që ushtrojnë veprimtarinë e operatorit të tregut të energjisë elektrike/gazit natyror - të ardhurat e realizuara nga aktiviteti i licencuar.
- b. Për shoqëritë që ushtrojnë veprimtarinë e operimit në hapësirat e depozitimit të gazit natyror- të ardhurat e realizuara nga aktiviteti i licencuar.
- nj. Neni 6.3 ndryshon dhe bëhet: Për shoqëritë e licencuara në aktivitetin e prodhimit të energjisë elektrike, furnizimit dhe tregëtimit të energjisë elektrike dhe gazit natyror që në vitin paraardhës nuk kanë pasur aktivitet, pagesa rregullatore do të jetë një shumë fikse prej 100 mijë lekësh.
- o. Neni 6.4 ndryshon dhe bëhet: Në rastet kur një shoqëri e licencuar në aktivitetet e energjisë elektrike apo gazit natyror, nuk ka paraqitur pasqyrat financiare, sipas afateve të parashikuara në legjislacionit në fuqi, atëherë ERE do të përlllogaritë këtë pagesë mbi bazën e vlerësimeve nga të dhëna të marra nga Publikime Zyrtare.
- p. Neni 9 ndryshon dhe bëhet:
- 9.1 Në rast se i licencuari nuk bën pagesën rregullatore brenda 30 ditëve nga data e marrjes së vendimit të ERE mbi përcaktimin e pagesës rregullatore, ndaj tij zbatohen sanksione në përputhje me nenin 107 të Ligjit nr. 43/2015 “Për Sektorin e Energjisë Elektrike”, i ndryshuar dhe nenit 106 të Ligjit nr. 102/2015 “Për Sektorin e Gazit Natyror”, i ndryshuar.
  - 9.2 Refuzimi i paraqitjes së pasqyrave financiare në kohë ose dërgimi me vonesë i tyre përbëjnë kundravajtje administrative dhe ndëshkohen sipas pikës 1 gërma (b) nenit 107 të Ligjit Nr. 43/2015 “Për Sektorin e Energjisë

Elektrike” i ndryshuar dhe pikës 1 germa a) (ii) të nenit 106 të Ligjit Nr. 102/2015 Për Sektorin e Gazit Natyror.

9.3 Në rast se i licencuari nuk përmbush detyrimin për kryerjen e pagesës rregullatore edhe pas masës së marrë sipas pikës 9.1. e 9.2 të këtij neni, atëherë ndaj tij Bordi mund të fillojë procedurat për heqjen e licencës, siç përcaktuar në pikën 1 (ç) të nenit 42 të Ligjit Nr. 43/2015 “Për sektorin e Energjisë Elektrike” i ndryshuar dhe pikës 1 (ç) te nenit 27 të Ligjit nr. 102/2015 "Për Sektorin e Gazit Natyror", i ndryshuar.

**q.** neni 10 ndryshon dhe bëhet : Rregullorja për përcaktimin e pagesave rregullatore për të gjithë të licensuarit e tregut të energjisë nga Enti Rregullator i Energjisë, është objekt ndryshimesh apo rishikimi vetem me vendimin e Bordit të ERE.

2. Drejtoria Juridike dhe Zgjidhjes së Mosmarrëveshjeve, të njoftojë palët e interesit për vendimin e bordit të ERE-s.

Ky vendim hyn në fuqi pas botimit në Fletoren Zyrtare.

Për këtë vendim mund të kërkohet rishikim në ERE brenda 7 ditëve nga marrja dijeni.

Ky vendim mund të ankimohet në Gjykatën Administrative Tiranë, brenda 30 ditëve kalendarike nga botimi në Fletoren Zyrtare për veprimtaritë në sektorin e energjisë elektrike dhe brenda 45 ditëve kalendarike për aktivitetet në sektorin e gazit natyror.

Ky vendim botohet në Fletoren Zyrtare.

**KRYETARI I ERE**

**Petrit AHMETI**



## ENTI RREGULLATOR I ENERGJISË

### RREGULLORE

### MBI PËRCAKTIMIN E MIRATIMIN E PAGESAVE RREGULLATORE

*Miraturar me vendimin e Bordit nr.190, datë 23.11.2017, i ndryshuar me  
Vendimin nr.129, datë 10.08.2020.*

#### **Neni 1**

#### **Autoriteti**

Rregullorja për përcaktimin e pagesave rregullatore për të gjithë të licencuarit e tregut të energjisë elektrike dhe gazit natyror nga Enti Rregullator i Energjisë, është hartuar në përputhje me kërkesat e Ligjit nr. 43/2015 “Për Sektorin e Energjisë Elektrike”, i ndryshuar dhe Ligjit Nr. 102/2015 “Për Sektorin e gazit natyror”, i ndryshuar.

#### **Neni 2**

#### **Qëllimi**

Qëllimi i kësaj rregulloreje është të përcaktojë rregullat për llogaritjen e pagesave rregullatore për të gjithë të licencuarit në tregun e energjisë si një nga burimet kryesore të financimit të ERE-s, me qëllim mbulimin e kostove të aktivitetit të rregullimit.

#### **Neni 3**

#### **Objektivi**

Objektivi i kësaj rregulloreje të llogaritjes të pagesave rregullatore është të përcaktojë pagesa rregullatore të veçanta për të gjithë të licencuarit në aktivitetin e prodhimit, transmetimit, shpërndarjes, operimit të sistemeve të mbyllura të shpërndarjes, furnizimit, tregtimit dhe operimit të tregut të energjisë elektrike dhe për të gjithë të licencuarit në aktivitetin e transmetimit të gazit natyror, shpërndarjes së gazit natyror, furnizimit të gazit natyror, tregtimit të gazit natyror, operimit në hapësirat e depozitimit të gazit natyror, operim në impiantet e GNL-së; funksionimin e operatorit të tregut të gazit natyror.

#### **Neni 4**

#### **Termet e përdorur në metodologji**

Termet e përdorur në këtë rregullore kanë kuptimin si më poshtë:

- 4.1 **Pagesa rregullatore** – pagesa vjetore që të gjitha shoqëritë e licencuara në sektorin e energjisë elektrike dhe gazit natyror paguajnë për llogari të ERE-s për të mbuluar kostot e veprimtarisë rregullatore.

- 4.2 **Të Licencuar** – Shoqëri të cilat janë licencuar nga ERE për veprimtaritë sipas pikës 2 të nenit 37 të Ligjit nr. 43/2015 “Për sektorin e energjisë elektrike”, i ndryshuar dhe pikës 2 të nenit 22 të Ligjit nr. 102/2015 “Për sektorin e gazit natyror”, i ndryshuar.
- 4.3 **Të ardhurat** – nënkuptojnë të ardhurat vjetore të realizuara nga aktiviteti I licencuar, të deklaruara në pasqyrat financiare të audituara referuar Standarteve të Kontabilitetit në fuqi.
- 4.4 **Tregu i energjisë** - do të thotë tregut të energjisë elektrike dhe atij të gazit natyror në kuptim të Ligjit nr. 43/2015 “Për sektorin e energjisë elektrike”, i ndryshuar dhe ligjit nr. 102/2015“ Për sektorin e gazit natyror”, i ndryshuar.

## **Neni 5**

### **Rregulla të përgjithshme dhe parime bazë**

- 5.1 Kjo rregullore është konceptuar konform nenit 17 të Ligjit nr. 43/2015 “Për Sektorin e Energjisë Elektrike”, i ndryshuar dhe nenit 14 të Ligjit nr. 102/2015 “Për Sektorin e Gazit Natyror”, i ndryshuar, ku parashikohet se:
- a. Burimet financiare të ERE-s përbëhen nga pagesat rregullatore, të vendosura nga ajo vetë për të licencuarit në sektorin e energjisë elektrike dhe nga pagesat e licencave.
  - b. ERE mban llogari të plota për shpenzimet e kryera, në përputhje me legjislacionin në fuqi mbi kontabilitetin.
  - c. ERE përcakton dhe miraton pagesat e aplikimit për licencë dhe pagesat rregullatore për të licencuarit në sektorin e gazit natyror, në përputhje me metodologjinë e miratuar prej saj.
- 5.2 Pagesa rregullatore, në zbatim të pikës 52 të nenit 3 të Ligjit 43/2015 “Për Sektorin e Energjisë Elektrike” i ndryshuar dhe pikës 69 të nenit 4 të Ligjit 102/2015 “Për Sektorin e Gazit Natyror” i ndryshuar, llogaritet dhe mblidhet mbi baza vjetore për çdo shoqëri të licencuar, pavarësisht faktit nëse në momentin e llogaritjes së kësaj pagese shoqëria nuk e ka filluar aktivitetin për të cilin është licencuar.
- 5.3 Pagesa duhet të jetë në përpjestim të drejtë me të ardhurat vjetore që vijnë nga veprimtaria e licencuar.
- 5.4 Të licencuarit në zbatim të neneve 45 e 46 të Ligjit nr. 43/2015 “Për Sektorin e Energjisë Elektrike”, i ndryshuar dhe nenit 30 të Ligjit nr. 102/2015 “Për Sektorin e Gazit Natyror”, i ndryshuar dhe në zbatim të kushteve të licencës depozitojnë në ERE deri më datë 31 janar të vitit pasardhës pasqyra të plota për vitin e mëparshëm ushtrimor e më tej deri në datë 30 qershor kopje të audituar të pasqyrave financiare të periudhës së mëparshme nga ku rezulton informacioni mbi të ardhurat e realizuara nga aktiviteti i licencuar që do të përdoren në llogaritjen e pagesave të rregullatore.

- 5.5 Pagesat rregullatore do të miratohen jo më vonë se 60 ditë pas miratimit të buxhetit të ERE të vitit aktual.

## Neni 6

### **Përcaktimi i pagesës rregullatore për të licencuarit në sektorin e energjisë**

- 6.1 Pagesat rregullatore do të llogariten bazuar në peshën specifike që zënë të ardhurat e realizuara nga aktiviteti i çdo të licencuari në vitin paraardhës ndaj totalit të të ardhurave të sektorit të energjisë elektrike dhe gazit natyror të realizuar për të njëjtën periudhë.
- 6.1.1 Të ardhurat për efekt të llogaritjes së pagesave rregullatore do të konsiderohen:
- a. **Për shoqëritë e prodhimit të energjisë elektrike** - të ardhurat e realizuara nga shitja e energjisë elektrike të prodhuar.
  - b. **Për shoqëritë e transmetimit dhe shpërndarjes së energjisë elektrike/gazit natyror** - të ardhurat e realizuara nga aktiviteti i transmetimit dhe shpërndarjes së energjisë / gazit natyror;
  - c. **Për shoqëritë e furnizimit dhe të tregtimit të energjisë elektrike/gazit natyror**- të ardhurat (vlera e shtuar) të realizuara nga shit-blerja e energjisë elektrike/gazit natyror.
  - d. **Për shoqëritë që ushtrojnë veprimtarinë e operatorit të tregut të energjisë elektrike/gazit natyror** - të ardhurat e realizuara nga aktiviteti i licencuar.
  - e. **Për shoqëritë që ushtrojnë veprimtarinë e operimit në hapësirat e depozitimit të gazit natyror**- të ardhurat e realizuara nga aktiviteti i licencuar.
- 6.2 Pagesa rregullatore për secilin të licensuar është e barabartë me produktin e peshës specifike të llogaritur sipas pikës 6.1 me vleftën për t'u shpërndarë në buxhetin e ERE-s (pasi të jenë zbritur pagesat fikse nga të licencuarit) të përcaktuar sipas pikës 1 të nenit 17 të Ligjit Nr. 43/2015 “Për Sektorin e Energjisë Elektrike”, i ndryshuar.
- 6.3 Për shoqëritë e licencuara në aktivitetin e prodhimit të energjisë elektrike, furnizimit dhe tregtimit të energjisë elektrike dhe gazit natyror që në vitin paraardhës nuk kanë pasur aktivitet, pagesa rregullatore do të jetë një shumë fikse prej 100 mijë lekësh.
- 6.4 Në rastet kur një shoqëri e licencuar në aktivitetet e energjisë elektrike apo gazit natyror, nuk ka paraqitur pasqyrat financiare, sipas afateve të parashikuara në legjislacionin në fuqi, atëherë ERE do të përlllogaritë këtë pagesë mbi bazën e vlerësimeve nga të dhëna të marra nga Publikime Zyrtare.



**Neni 7**  
**Korrigjimi**

ERE, me paraqitjen e një kërkesë nga të licencuarit në rast të pasaktësive të llogaritjes në lidhje me të ardhurat nga aktiviteti i licencuar, rillogarit dhe korrigjon pagesën rregullatore të vitit aktual në pagesën rregullatore të vitit pasardhës.

**Neni 8**  
**Njoftimi**

- 8.1 ERE pasi përcakton pagesat rregullatore njofton të licencuarin për vlerën, afatet e pagesës për vitin ushtrimor, vendin e kryerjes së këtyre pagesave dhe penalitetet në rast se kjo pagesë nuk kryhet në kohë.
- 8.2 Pagesat rregullatore depozitohen nga ERE në një llogari të veçantë, të hapur në një nga bankat që operojnë sipas legjislacionit shqiptar në fuqi.

**Neni 9**  
**Penalitetet**

- 9.1 Në rast se i licencuari nuk bën pagesën rregullatore brenda 30 ditëve nga data e marrjes së vendimit të ERE mbi përcaktimin e pagesës rregullatore, ndaj tij zbatohen sanksione, në përputhje me nenin 107 të Ligjit nr. 43/2015 “Për Sektorin e Energjisë Elektrike”, i ndryshuar dhe nenit 106 të Ligjit nr. 102/2015 “Për Sektorin e Gazit Natyror”, i ndryshuar.
- 9.2 Refuzimi i paraqitjes së pasqyrave financiare në kohë ose dërgimi me vonesë i tyre përbëjnë kundravajtje administrative dhe ndëshkohen sipas pikës 1, gërma (b) e nenit 107 të Ligjit Nr. 43/2015 “Për Sektorin e Energjisë Elektrike”, i ndryshuar dhe pikës 1, gërma a) (ii) të nenit 106 të Ligjit Nr. 102/2015 “Për Sektorin e Gazit Natyror”.
- 9.3 Në rast se i licencuari nuk përmbush detyrimin për kryerjen e pagesës rregullatore edhe pas masës së marrë sipas pikës 9.1. e 9.2 të këtij neni, atëherë ndaj tij Bordi mund të fillojë procedurat për heqjen e licencës, siç përcaktuar në pikën 1 (ç) të nenit 42 të Ligjit Nr. 43/2015 “Për sektorin e Energjisë Elektrike”, i ndryshuar dhe pikës 1 (ç) të nenit 27 të Ligjit nr. 102/2015 "Për Sektorin e Gazit Natyror", i ndryshuar.

**Neni 10**  
**Dispozita përfundimtare**

Rregullorja për përcaktimin e pagesave rregullatore për të gjithë të licencuarit e tregut të energjisë nga Enti Rregullator i Energjisë, është objekt ndryshimesh apo rishikimi vetëm me vendimin e Bordit të ERE.